

說

郭

續

說郭續目錄

目錄第四十一

荔枝譜 徐渤

荔枝譜 宋王

荔枝譜 曹蕃

荔枝譜 鄧道勳

記荔枝 吳載鰲

廣菌譜 潘之恒

種芋法 黃省曾

野菜箋 屠本峻

野菜譜 滑浩

荔支譜卷上

晉安徐勣

荔支自宋蔡忠惠公譜錄而其名益著世代旣遐種類日夥騷人韻士題品漸廣然散逸不收則子墨之失職而山林之曠典也惟時朱夏側生斯出名題於西川貢珍於南海吾閩所產實冠彼都可謂盧橘慚香楊梅避色者矣爰倣蔡書別品茲譜狀四郡品目之殊陳生植制用之法旁羅事蹟襍采詠題品則專取吾閩事乃兼收廣蜀物匪舊存品惟今疏深媿聞

見未殫筆札荒謬博雅君子將厯挂漏之譏予小子其何敢辭焉

福州品

一品紅福州產之極品者故名

狀元紅顆極大味清甘福州產爲第一種與莆中異江家綠皮綠刺紅大如鷄子味極清美蔡譜所記之樹已絕其種永慶里猶有傳者

虎皮蔡譜謂出大乘寺今寺廢樹絕惟靈岫里山前有之

牛心詳出蔡譜今歸義里三箇方南舖有此種

蚶殼以狀言之已見蔡譜今亦出歸義里

馳蹄長大甘柔

金櫻上銳下方色深黃

栗玉似金櫻而圓味差勝

洞中紅出宿猿洞因名

星毬紅枝條生葉葉比他種差厚色紅而不絳扁者如橘圓者如雞子核皆如丁香亦有無核者食之甘脆有韻蓋神品也奪其枝而植者竟莫能逮焉出靈

岫里今永慶里亦有之

饅頭皮粗厚味甘大如饅頭故名

磨盤皮粗厚味甘大如雞子近蒂處甚平七月熟金線實圓刺尖有金線界其中出永慶里

鳳池超實圓味甘出尚幹鄉故御史林公鉞家

中冠亦呼中觀體圓核小皮光味清大不如桂林成熟時香聞數里惟鳳岡環水內者肉裹其核過半他處肉薄核露風味頓減

桂林皮粗厚大如雞子味甘

金鐘形如鐘皮畧粗厚色如硃砂味甘大類桂林
勝諸皮厚刺尖味甘肉豐大似桂林七月熟出長樂
縣六都者最佳他種不及

鑽玉皮粗厚味甘濃實似金鐘風岡產爲最

綠珠一名結綠俗呼綠荔支實如山榛無核味最清
至熟時實與葉無辨惟風岡有之此異品也

紅繡鞋實小而尖形如角黍核如丁香味極甘美傳
卽十八娘種今惟歸義里枕峰山有之

龍牙色紅長二寸許上下俱方出永慶里蔡譜獨載

興化軍一種與此稍異

鷄引子一朵數十枚大小錯出其大者核小小者無核七月熟宋侍郎鄭文肅公湜墓前一株今四百餘年其樹猶存墓在城門山

天柱樹極高大出鳳岡

山中冠實大而圓餘荔將盡此荔始熟味微酸澁馬先白實類海山其熟最早味不甚甘

山金鐘實大微長荔之中等者

中秋綠色綠亦山枝種味微酸熟最後故名中秋

松栢蕾皮厚而粗味澁大如松子故名

勝江萍以味甘得名皮光山枝中之最佳者或呼爲
勝江陳淨江瓶俱此種

勝江陳

淨江瓶

滿林香實絕類桂林皮微黃味甘其香倍於衆品

鶯卵皮光無刺色紅出歸義里

蜜九味甘肉厚俗呼肉九

鵲卵皮薄實圓斑如鵲卵味微酸山枝中之佳者七

荔枝譜

八 徐

四

月熟

白蜜皮粉紅甘如蜜

醋甕色微黃味酸品之最下

將軍帽實如松蕾皮厚肉澁

雞肝實扁味甘色紅俱無核出清廉里

牛膽顆極大一握僅三四枚山枝品之異者出水西

桐坑

火山亦呼海山廣南種肉薄味酸四月熟品最下

郡西自閩清古田皆不可種蓋此二邑厥土高

寒也北自連江羅源近海之處間亦有之實小
味酸色不深紅其熟差晚半月郡之附郭獨鳳
岡一村其種類甚夥不下數百萬株大者十圍
高二十丈名曰天柱皆五代時居民所植者至
今蕃盛不絕更長樂一邑尤爲奇妙蔡譜自江
家錄以下十九種與今時所產品目各異按譜
索之十不得三四豈卽當時之種而異其名邪
今所最重於時者中冠勝畫狀元紅次則桂林
金鐘大抵閩中之產可弟視南粵僕視瀘戎君

荔枝譜

入

五

謨譜爲果中第一信非虛也

興化品

皺玉

郎官紅

游丁香

紫瑤

百步蘭壽香

西紫

黃香

大小江綠

瑞堂紅

松紅

麝囊紅

百步香

黃玉

玉堂紅

延壽紅出延壽里實比狀元紅差大肉厚核小宋徐
鐸所植之樹猶存

狀元紅卽延壽紅種皮薄肉厚核小味香莆產此爲
第一

綠紗一名綠羅袍味甘

白蜜色白味甘

青甜

霞墩荔支實類狀元紅出霞墩故名

蔡宅紅出蔡君謨故居因以爲名

陳紫詳見蔡譜第二篇今下林尚有三株卽當時物

松蕾

溜

宋家香核小味甘傳自宋公樹者因名今宋氏宗祠後有一樹

黃石紅出穀城山樹高三十餘丈大可十一二圍其陰可蔭十畝傳云卽君謨請中宋公樹王氏老嫗抱泣者至今猶存

星垂皮紅實如鴨卵荔支之最大者俗呼秤錘出莆田吳塘村樹大七八圍腹空可容五六人盤根如山蓋數千年之物

火山肉薄味酸四月熟

莆中荔枝蔡譜謂名家不過十餘品今譜中所載亦不多見如玉堂紅一種在南廂下林乃宋名臣陳大卞手植居第之果也狀元紅出於楓亭者珍於時舊名延壽紅宋元豐間狀元徐鐸所植鐸於楓亭薛奕以文武雙魁遂結姻媾故授其種於奕而楓亭之地宜荔因擅其名今驛舍中庭六株色皆參天其外數十里紅翠掩映一望如錦皆此種也至於夏初先熟厥名火山

者莆中惟黃巷有之蔡譜謂其品殿殿有翼嘗
詆東坡四月食荔支謂坡未嘗到閩不識真荔
支是特火山耳王敬美謂莆中狀元香不如長
樂之勝畫而勝畫乾之不如狀元香風味此評
殊當

泉州品

大將軍

七夕紅

桂林

荔枝譜

大餘

八

中冠俗以光皮者爲上

金鐘

早紅

白蜜

狀元紅

張官人

馬家綠

百步香

松蕾

火烟

鰲卵皮紅大如鰲卵核如米粒

丁香核小得名

綠衣郎皮綠如瓜皮實如鴨卵味甘澁出晉江

黑葉皮紅比狀元紅稍大味甘

麻餅實如黑葉味甘酸

火山肉薄味酸四月熟

柳鐘巖極大實類興化秤錘

進貢子其熟最先實如黑葉味甘不似火山

泉中荔支蔡譜惟推藍家紅法石白二品紹興
初郡守葉廷珪植二百株於郡圃王十朋第之
以大將軍爲第一今大將軍尚有存者而藍家
紅法石白在宋時已不可識矣他邑如南安同
安惠安諸種以桂林綠衣郎黑葉爲上安溪雖
產不及南同惠三邑之多若永春德化種遂寡
寥矣

漳州品

火山

中半

虎皮斑

南海

綠羅袍出平和琯溪張氏者佳

陳紅

冰團

大綠

小綠

余家綠

中冠

金鐘

黑葉

漳中荔枝蔡譜惟載何家紅一品耳茲且歲久其品遂絕今龍溪種佳者瓢厚核小味甘其次唯火山爲盛肉薄味酸頓減聲價大抵漳郡不及泉中遠甚漳平龍巖二邑不產

荔枝譜卷下

晉安徐勣

一之種

荔枝入土種者氣薄不蕃雖蕃不結實間有成樹者
經十餘歲稍稍結顆肉酸澁無味鄉人于清明前後
十日內將枝稍刮去外皮一節上加膩土用棕裹之
至秋露枝上生根以細齒鋸從根處截下植之他所
勿令動搖三歲結子纍然矣 接枝之法取種不佳
者截去元樹枝莖以利刀微啓小隙將別枝削針種

固隙中皮肉相向用樹皮封緊寬緊得所以牛糞和泥斟酌裹之凡接枝必待時暄蓋欲藉陽和之氣一經接博二氣交通則轉惡爲美也若近海魚鹽之處斤酒土鹹其味微酸不佳縱奪接之終不能以彼易此也

二之焙

荔枝宜熱最畏高寒古樹歷數百年者枝柯詰屈根幹盤旋其陰可蔽數畝此歲久根深縱霜霰侵壓不過葉瘁無損於樹當春仍發新葉開花結實至于新

種不歷十數年者樹稗根淺一遇霜霰隨即枯萎明年不復花實鄉人有愛其樹者當極寒時樹下以稻草煨火緼之寒氣不侵葉無凋損秋冬之際以淤泥和糞壅壓其根仍伐去枯條不令礙樹逢春尤易發生更有歇枝之樹隔一年而實者詳見蔡譜

三之啖

蔡譜引列仙傳本草經謂食荔有益於人可以得仙當盛夏時乘曉入林中帶露摘下浸以冷泉則殼脆肉寒色香味俱不變嚼之消如絳雪甘若醍醐沁心

入脾蠲渴補髓啖可至數百顆或畏其飽點鹽少許
嗽之卽消其鄉民鬻於市者積擔盈筐離其本枝暑
氣侵觸香色稍減較之就食林中者味亦不逮非必
如白傅所云一日二日三日而後變也鄉人常選鮮
紅者於竹林中擇巨竹鑿開一竅置荔枝節中仍以竹
籜裹泥封固其隙藉竹生氣滋潤可藏至冬春色香
不變若紅鹽火焙曬煎者俱失真味竟成二物矣

四之曬

占風日晴霽時摘下於烈日中朗曬至乾以核實爲

準風味殊勝於焙用竹籠箬葉密封可致久遠若風雨暴至則肌肉潰爛反不如焙矣蔡譜有紅鹽之法今貢獻不行其法尠傳

五之焙

擇空室一所中燔柴數百斤兩邊用竹筴各十每筴盛荔三百斤密圍四壁不令通氣焙至二日一夜荔遂乾實過焙傷火則肉焦苦不堪食乾者狀元香最佳鄉人多焙桂林金鐘以其實大美觀尤易于粥臘仙收乾荔法藏於新磁甕每鋪一層卽取鹽梅三五

箇箬葉裹如粽子狀置其內密封甕口則不蛀壞誠
意伯劉伯溫先生謂乾荔支變者先於殼上刺十許
孔用蜜水浸之以銀盂盛于湯罐頭上蒸透卽肉滿
可食

六之煎

荔初熟時采露連蒂摘下以黃蠟熬勻封點蒂上勿
令脫落盛之罐中將冬蜜煮熟得宜俟蜜冷浸之蜜
過於荔始不洩氣藏至來春開視如鮮若荔過熟則
漿滿肉腐不能久藏取蜜富以荔支花釀者爲第一

臞仙謂臨熟時摘入甕中澆蜜浸之以油紙封固甕口勿令滲水投井中雖久不損

七之漿

取荔初熟者味帶微酸時榨出白漿將蜜勻煮蜜熟爲度置之磁瓶箬葉封口完固經月漿蜜結成香膏食之美如醴酪荔肉仍以白蜜緩火熬熟淨磁器收之最忌近鐵 又法取生荔曬至一日頻將令勻去殼取肉每一斤白蜜一斤半於砂礮內慢火熬百千沸又以文武火養一日磁鉢攤于日中曬至蜜濃爲

度盛於磁甌見臞仙神隱

荔支譜

莆田宋珏

福業第一

荔支之於果僊也佛也實無一物得擬者江瑤柱河豚腴既非其倫塞蒲陶楊家果不堪作奴矣歐陽永叔比之牡丹亦觀場之見耳譬於月以爲鉤爲鏡爲珪皆第二月非月體也蔡君謨亦云剝之凝如水精食之消如絳雪其味之至不可得而狀也夫不可得而狀迺深於荔支者矣荔支之在天下以閩四郡爲

最四郡以吾興爲最興又以楓亭爲最此人所知者
然不盡然黑葉之入釀未可以粵產輕之莆城外若
東埔若霞墩實有可鄒視楓亭者人不辨耳余生于
莆旣幸與此果遇且天賦噉量每噉日能一二千顆
值熟時自初盛至中晚腹中無慮藏十餘萬而喜別
品喜檢譜始以泉浸繼以漿解磁盆筠籠一物不具
則寧不噉知交中噉量差與下敵者獨有郭聖胎方
次道二人次道不能拈碧聖胎客秣陵五六歲歲不
一歸歸又不必與熟時值也豈能消受清福也乎彼

不知者又無論矣蘇子瞻曰日啖荔枝三百顆不妨
長作嶺南人又曰我生涉世本爲口南來萬里真良
圖語雖激亦有味乎言也况余每歲娉婆樹下有十
餘萬在腹中又何嫌蝮蛆海鰕也哉旣私喜于荔枝
獨擅果然之餘不能自秘自蔡譜及徐氏譜外別著
食譜三百餘條未皇詮次適道協以其新刻見示因
以清福黑業共六十七事俚之以廣同好亦玉照堂
梅品遺意也

食荔清福 三十三事

開花雨時 結實風時 次第熟

雨初過 裊露摘 護持無偷摘

同好至 晚涼 新月

浴罷 簪茉莉 拈重碧

微醉 科頭箕踞 佳人剝

乳泉浸 蜜漿解 臨流

對鶴 樓頭 聯騎出觀

名品嘗遍 檢譜 辨核

貯白磁盆 懸青筠籠 着白苧

掛帳中

殼堆苔上

膜浮水面

色香味全

隔竹聞香

土人忽送

食荔黑業

三十四事

暴雨

妬風

偷兒先嘗

鳥嘴啄

蜂蟻

蛙帶

烈日中摘

斷林

剝漬糖蜜

無清泉

點茶

不喜食者在

數核

啖不得飽

溪水浸

腥鹹解

魚肉側

殼上有景迹

醉飽後

市販爭價

說貴賤

惡咏

搜

博

懷藏

主人慳鄙

忌熱勸莫餐

色香稍變

白曬

焙乾

不識品核

無釀法

松蕾出

樹杪如晨星

荔枝第二

生閩海者未必皆見此果得見此果熟時得噉噉又得飽又得遍嘗名品以飽此直探蛟人之官入齊奴

之室恣取其徑寸晶珠盈丈珊瑚以歸不容易也此
吳越好事一聞生荔支者以耳爲目復以耳爲口涎
垂至踵思褰裳濡足而無從也然世不乏好奇客竟
未有越千里百里爲荔支而至者乃土人耳目所慣
恬不知寶晶珠珊瑚視與甘桃甜李無異余故有清
福黑業之喻矣里中同好旣稀食量亦罕每欲招數
爰結爲一社如蓮社梅社之類亦復參差不果暮春
方次道見過余預及之次道喜曰吾去夏客雲間苦
憶此物今當不輕放過遂於六月六日先集林謙伯

受伯之崔園約日一舉至荔謝而止約言凡五則余
爲盟主焉夫以希奇靈異之物而能珍惜之留護之
結以同趣集以嘉晨暮以濃陰浴以冷泉披以快風
照以涼月和以重碧解以寒漿徵以往牒紀以新詞
雖跡涸塵壤而景界仙都身坐火城而神遊冰谷寧
獨吳越好事遙想不得卽自傳劈紫綃於南賓蘇翁
薦虬珠于嶺表亦第無佛稱尊不能與我輩作敵明
矣

社以火山盡日修以松蕾出日止每日一人直之日

以三千顆爲率多者益善

宜社者先期報帖社無定所古刹名園各適其勝方
舟連騎隨奏其宜多在郊岡尤爲幽寂

社以辰而集造酉而散午其蔬粥一餐晚佐清漿數
竿勿爲豐侈壓脰以點雅集

散時各拈一題一韻次社彙呈如不成者罰出荔支
三千顆集時專以飲噉爲事不復以吟咏開心隨意
携茶鑰夾具枕簟香爐談笑而已

敗意者逃避應嚴好事者闌入勿拒

術蔡第三

梁蕭惠開云南方之珍惟荔枝矣其味絕美楊梅盧
橘自可投諸藩溷故東坡詩云南村諸楊北村盧直
與荔枝爲先驅君謨謂一木之實生于海瀕巖險之
遠性畏高寒不堪移植曾不得班于盧橘江橙小發
光彩此譜所由作也

浪齋便錄曰唐世進荔枝貢自南方楊妃外傳以貢
自海南杜詩亦云南海及炎方惟張君房以爲忠州
東坡以爲涪州未得其真近閱涪州圖經及詢土人

云涪州有妃子園荔枝蓋妃嗜生荔枝以驛騎傳遞
故君謨譜曰天寶中妃子尤愛嗜涪州歲命驛致又
曰洛陽取於嶺南長安來於巴蜀此實錄也後人不
須置喙矣

晚香堂抄云楊貴妃生日帝命許雲封等小部張樂
長生殿因奏新曲未有名會南方進荔枝因名曰荔
支香故杜子美病橘詩云憶昔南海使奔騰獻荔枝
百馬死山谷到今耆舊悲又解悶詩云先帝貴妃今
寂寞荔枝還復人長安則明皇時進荔枝非嶺表明

矣蔡君謨云生荔支中國未之見也九齡居易圖見
新實亦未遇人真荔支然則東坡所云永元荔支來
交州天寶歲貢取之涪皆非生荔支也張君房脞說
亦以爲忠州何耶豈未讀君謨譜乎

歐陽修啓上君謨端明侍郎遂爾大暄不審氣體何
似承已對謝應已漸治裝無由詣前日劇瞻企荔支
圖已令崔慤傳寫自是一段佳事碑文好者前已倒
篋今又于東退簾中得此數十本勒李敷送上因出
過門爲幸不宜修頓首

又一帖與七哥制幹云熱甚不審尊體起居何如
中荔子新熟分奉四百枚今歲風亭熱皆晚候有佳
品當特獻耳五月廿四日襄啓

浪齋便錄曰蔡君謨守泉州書荔支譜于安靜堂有
鄭熊者亦記廣中荔支凡二十二種以附蔡譜之末
曰玉英子曰樵核曰沉香曰丁香曰紅羅曰透骨曰
并呵曰僧耆頭曰水母子曰蒺藜曰大將軍曰小將
軍曰大蠟曰小蠟曰松子曰蛇皮曰青荔支曰銀荔
支曰不意子曰火山曰野山曰五色荔支

牒朱第四

林慮齋云朱香乃宋故家喬木也蔡譜品題此居其
最靈根一株生香不斷數百年之風味猶存今朱君
對此樹而植斯堂堂成求扁于余因題之曰品中第
一景定壬戌之姪竹溪林希逸書

輒醉老人云至正癸卯燕會于宋氏之庭庭有古荔
樹擅名朱香者世傳舊屬王氏黃巢亂兵欲斧薪之
王媼擁樹號泣願與俱死賊憫之斫樹一斧而止荔
子迄今有斧痕蔡端明亦譜其略時之相去五百

餘年樹益向榮根本蟠踞層陰蔽虧叅政公移席其
下慷慨懷古酌以卮酒俾予摹寫詠歌之以紀良集
八十翁張師夔書于輒醉齋

林崇璧云莆中名產稱荔支爲殊品而荔支之尤者
惟陳紫朱香爲特勝蔡公譜藥謂陳紫種出朱氏則
朱香較之陳紫又其尤也樹距作譜時已三百禩迄
今又不知幾代洪武間相繼奪于戎衛之官朱子孫
不克復者凡二十餘載迨永樂初年始返業于朱朱
君文用者驟復而喜已又戚然懼其復失也一日持

荔支譜

宋

八

蔡端明墨跡及張氏師夔所作畫圖來徵記于余永樂乙酉嘉平月林環書

錢氏聞遊志曰宋香陳子所從出核有斧痕余驗之實然樹在宋氏宗祠後至正戊戌六月宋介夫遺百顆與盧希韓并搦蔡公詩墨一紙不和蔡韻有多情故舊偏憐我一種甘香更可人宋祖芳名傳不滅蔡公妙跡玩猶新之句亦刻於石永樂以後樹漸枯死今其世孫宋比玉烏山屋傍尚有一樹大數十圍樹腹已空可坐四五人相傳是其孫枝云

朱季和詩曰蔡公譜張老圖宋香品第世絕殊亭
嘉植榮且敷巢兵欲斧炊行厨王媪抱樹死與俱尤
物幸耳留恨株宋氏老人八十餘得之卽此營世居
五百餘禩枝巢舒清陰如幄垂庭除薰風時來蘭麝
如赤日照耀珊瑚珠桃紅籠出白雪膚斧痕着核留
真模異香奇味天下無有絲文用美且都撫之愛護
如瓊琚故家喬木多摧枯雲仍世守應無虞

林希哲詩曰吾莆名果鮮荔枝君謨有譜世所知陳
紫方紅固爲貴宋香品彙尤珍奇六月炎敲日正長

紫紫綠葉垂絳囊薰風微度疎林晚北隣猶覺聞清
香核上儼若斤斧痕茲事奇怪難評論云是當年巢
寇亂欲伐其枝投熒熒皤皤老嫗以身庇天然幻出
斯靈異至今又歷數百年後人培植常留意

荔枝酒第五

嶺南好事作荔枝醞頭取荔枝肉榨之入酥酪辛辣
以合醬又作簽肉以荔枝肉作椰子花與酥酪同炒
土人大嗜之此荔枝一厄也卽蔡譜中紅鹽蜜煎白
醴亦失荔枝之性惟順昌雪花火酒以荔枝投之決

旬而出濃艷幽沈如西施醉倚玉牀太真溫泉出澗
用泥頭封固其酒至隔歲開之滿屋作新荔支香矣
南海人以黑葉入釀與粵西寄生酒并重于江南
諸各製俱備而不知釀法何也豈公嗜茶而不喜飲
耶新安程隱士孟陽曾于殷司馬坐中嘗之因作荔
支酒歌曰君不見杜陵諸侯老賓客左撈輕紅右拈
碧至今浣花詩句中春酒荔支色相射誰將巧意相
和洩便釀荔支作春酒重碧輕紅兩有無萬里瑩然
落吾手風流司馬霜鬢鬚玉盤珍羞十萬鋪天輸尤

物慰好事遙從庾嶺飛百壺飲中余考最下戶一勺
分潤詩腸枯銀罌乍發香氣麝玉杯映色清若無北
客浪傳酒如乳吳儂已墮涎成珠主人貪奇樂更殊
金昇笑出如花姝自將丰骨比妍麗羅襦玉膚不用
摹韶顏若并化爲酒玉山共倒誰當扶君不見坡仙
流離南海噉百顆一官爲口誇良圖何如三絕眼前
是果爲醺醺人醍醐但恨古人不見爾君我不樂何
爲乎荔支之妙如此而當時蔡公不及余因取而補
之

余與吳楚文人嘗荔支酒戲作一詩紀之我有一樽
酒已是隔年藏泥頭雖夫開繞屋生幽香日夕遲所
歡緘固不忍嘗夫君自遠來下馬坐我牀遠行應渴
餓得無思瓊漿感此開泥頭盥手稱一觴君問此何
酒是名十八娘暑月辨色起裊露提筠筐稍頭掇繁
星樹底數鞏囊初卸紫羅襦後脫絳紗裳薌澤異蘭
蒨膚理等雪霜浴之以醺醪肌骨日清涼一酌祛世
慮再酌澆仙腸三酌風滿腋吹君將翺翺願君且勿
翔爲君歌短章妾本水晶毬今成琥珀光無由觀上

荔支譜

入宋

十一

國老死守炎方茗芋不成曲惆悵情內傷

又荔酒初熟紀事傳釀瑤漿法叮嚀授老妻色純精
種火味辣慎封泥缸面收新漉甕頭驗舊題世間何
物比應與芥茶齊

又與周六郎嘗荔支酒詩一首釀得荔支酒泥頭爲
汝開香風繞屋散翠色撲罌來擬茗春初芥方花雪
後梅一斟三贊歎坐看玉山頽

紀異第六

秣陵武進士孫稚明其父在日家巨富養鶴數十隻

中一隻飛去七日不歸及歸口嚼鮮荔支一穗共七枚廻翔而下視之皆如新摘孫召賓客子孫玩賞累日以示識者皆云此東粵荔支非閩種也然事亦奇異矣稚明天啓二年爲太湖總練親與予言時稚明已八九歲亦啖一枚云

余旣刻蔡公別紀偶於殘帙中檢得二則一墨客揮犀曰嶺南無雪閩中無雪建劍汀邵四州有之故北人嘲曰南人不識雪向道似楊花然南方楊柳實無花是南人非止不識雪兼不識楊花也无庚寅季冬

二十二日余時在長樂雨雪數寸遍山皆白土人莫
不相傾驚嘆是日召友人吳述正同賞時南軒梅一
株盛開述正笑曰如此景致亦恐北人所未識是歲
荔支樹皆凍死遍山連野彌望盡成枯林至後年春
始於舊根漸抽芽蘖又數年始復茂盛譜云荔支木
堅理難老至今有三百歲者生結不息今去君謨歿
五十年矣是三百五十年間未有此寒亦異事也

荔奴第七

側生見重於世詩賦歌詠連篇累牘獨旁挺寥寥何

也豈以色香頓殊味亦遠遜遂爾見輕耶然圓若驪
珠赤若金丸肉似玻璃核如黑漆補精益髓蠲渴扶
飢美顏色潤肌膚種種功效不可枚舉至于寄遠廣
販坐賈行商利反倍于荔子則龍目何可貶也至若
耳食之夫以荔熱傷人龍目大補及欲昂此輕彼則
婢學夫人不覺膝自屈矣

荔支淨盡龍目叢生時則玉露流晨金風扇晚緩剝
飽餐亦非人世所有譬梅花已殘忽有桃李牡丹初
謝重見芍藥幽蘭乍萎仍生蕙草皆不可無一不能

有二者也謂之曰奴其義如勝其功如殿然亦惟寶
圓虎目密毬等品方堪作奴耳

丙寅秋日歸故園噉龍眼有極佳者因隨意作一詩
紀之以示姪孫廷翼諸人今記其一平昔輕旁挺不
堪荔作奴今知奴有等賢蠢亦多途方回及陶侃自
比常奴殊外裝黃金飾中懷白玉屑破皆走盤顆
顆夜光珠更憐核似漆湛湛小兒臚龍目與虎目比
喻何其愚但恨荔熟時主在奴不俱安得其盤敦牀
頭捉刀夫際此清秋候晶晶空滿盂尼父思伯玉使

乎復使乎

雜紀第八

余刻荔支食譜成卽治越裝三月十五日也親朋相
送北郭指荔子丹爲歸期與妻孥別亦曰牆東一樹
留以待我若東埔陳紫二樹余每歲得飽噉者則陳
六郎書至謂子未歸吾東西樹不摘也無端留滯柘
浦至六月旣望舟始泊姑蔑城下先一日爲寶陀大
士現辰莆俗家有荔樹者屆辰盡摘供養卽在村落
亦必滿擔入城雖霞墩楓亭東埔諸名品未盡熟然

供養之餘因而飽噉者蓋多至廿日外諸名種次第
堪摘過此則松青出于樹如晨星矣是一年得噉荔
子者自五月晦前後造七月初旬僅可四十日耳無
端客姑蔑復十餘日翹首故園數樹如白榆之在天
上每與同行翁君譚及輒夜分不能寐翁曰休矣如
此說食還能飽否明日傳其語於孫不伐不伐新都
人問荔支之狀何若余曰難言也子不讀君謨譜乎
亦曰殼薄而平瓢厚而瑩剖之凝如水精食之消如
絳雪又曰暑雨初霽晚日熒耀綠葉絳囊鮮明掩映

車之間煨如星火非名畫之可得而精思之可述
然居易嘗爲之圖君謨亦令崔慤寫生無已吾亦貌
陳紫宋香以示君於是舟中無事東坡所謂指如懸
槌者每畫一枚孫生拍掌大叱以爲奇翁亦從旁歎
贊云咄咄逼真余笑謂翁如此飢看亦復飽人耶於
是且笑且畫共得四十五枚色澤膚理與生無別但
不能香味耳因憶壬寅夏日客建州僧舍亦不得歸
噉荔支偶見新安程孟陽墨寫荔支間以素馨數朶
一面書殷司馬坐上飲荔支酒歌畫雖不類而歌奇

古有韻堪爲荔酒傳神且能以素馨相掩映此其人
豈尋常也哉予憐其意口占一歌附方求仲往今七
年矣不知此扇已達孟陽及孟陽見歌以爲何如也
今旣寫圖并錄雜詩于左庶幾歸兄親朋妻孥藉以
解嘲或張之東埔樹下與六郎快讀一過不至移文
相誚爾萬曆戊申六月十九日大末舟中記

荔支譜

華亭曹蕃

閩中果實推荔支爲第一卽巴蜀所產能挾一騎紅
塵博妃子笑者亦未得與之雁行自蔡君謨學士著
譜聲價頓起時運遞遷種植蕃衍品格變幻月盛日
新閩人士爭哆口而艷談之卽永嘉之柑洞庭之楊
梅宣州之栗燕地之蘋婆果似俱爲荔支壓倒噲等
曾不敢與爲伍余驟聞其說竊竊致疑其然豈其然
乎遂于今歲暮春之初馳入閩中謂閩人士不佞素

惡負虛聲者此來將爲荔支定品迺聞人士之言曰
閩八郡延建汀邵地屬高寒時降霜霰不堪樹藝漳
不及泉泉不及福興君請自試之余遂栖遲於二郡
間泛蒲觴渡鵲橋踰兩月矣饗食稍歇無非咀嚼此
果津津乎其有味不敢妄肆譏彈而品遂定一日閩
人士造余邸而問曰聞君日啖三百顆曾與荔支評
月旦乎余笑曰今迺知閩人之譽言非誇也綠葉蓬
蓬團圓如蓋長陳插天赫曦若避吾愛其樹纍纍丹
實槎頭掛星晴光掩映照耀林藪吾愛其色絳囊乍

剖蟾珠初薦瓊漿玉液絕勝醍醐吾愛其味濕帶露
華寒凝絳雪薰風暗度疑對檀郎吾愛其香幸白長
慶之叙事傳神張曲江之賦語如畫此果已蒙九錫
產類實非八閩唯端明蔡學士興化軍人也生長於
扶荔之鄉間見旣眞殿最不爽一經品題遂爾增價
但今據譜牒中所載三十二品而索之陳紫江綠妙
矣卽彼稱中咽十亦不得二三豈其名號之鼎新抑
或今昔之異態余如未及大嚼而沒曰某佳某佳幾
於耳食恐寓內爭嘲吳人適爲閩人左袒致楊家果

便覺無色余滋服矣遂僅舉曾常試其風味者二十
餘種列於左自稱荔枝小乘云萬曆壬子舛誤

狀元紅 顆極大味清甘福州產爲上乘方伯邕園
亭中有一株摘數百顆相贈且曰不敢獨享此名也
余謂儉蔡譜當稱方家紅

星毬紅 扁者如橘圓者如雞卵核如丁香間亦有
無核者食之甘脆有韻神品也出靈岫里

磨盤 皮粗厚味甘大如鷄卵近蒂處甚平七月熟
玳瑁紅 殼上有黑點疎密如玳瑁故名見蔡譜

桂林 皮粗厚大如雞卵味甘

中冠 體圓核小皮光味清成熟時香聞樹下惟風
岡環水內者肉裹其核過半他處肉薄核露便當少
讓

金鐘 形如鐘皮稍粗厚色如辰砂味甘大類桂林
勝盡 皮厚刺尖味甘肉豐七月熟出長樂縣六都
者佳余留省士紳陸續見節可五千顆口啖不能盡
暴日乾之風味大勝於火焙

綠珠 一名綠羅袍味最清熟時實與棗色無辨惟

鳳岡有之異品也鳳岡村附郭種類最繁不下數百萬株大者十圍高二十丈名曰天柱五代時民間所植也至今猶存

紅繡鞋 實小而尖形如角黍核如丁香味絕甘美傳卽十八娘遺種蔡譜謂閩王王氏有女第十八好噉此品因而得名其塚今在福州城東報國寺旁
白蜜 皮粉紅甘如蜜

狀元香 舊名延壽紅皮薄肉厚核小味香莆陽產爲第一宋元豐間狀元徐鐸所植楓亭薛奕文武兩

魁也與鐸結秦晉因得傳其種而楓亭地稍汙邪宜
荔遂擅名彌山被野所產最盛楓亭驛荔支遂甲天
下

霞墩 以地名卽陳紫種也狀巨味甘林謙伯園在
霞墩中有荔數百株主人邀酌樹下噉飽而歸

星垂 殼紅實如鴨卵荔支之最大者俗呼秤錘
雙髻 狀絕小每穗必並頭雙蒂故名

火山 五月初先熟肉薄味酸品最下驟食之能損
絳囊生聲價

勝江萍

殼光味甘以後四種迺山枝之佳品也

滿林香

色微黃味甘甫及樹下芬芳迎鼻

牛膽

顆絕大出水西桐坑

中炆綠

殼色綠味微酸最晚熟因其時遂名中炆

大將軍

後四種泉州品也

丁香核

綠永郎

椰鐘

虎皮班

後四種漳州品也

中冠

金鐘

黑葉

余足不人泉漳口亦不及啖泉章品然大都荔枝
所產泉已不如福興漳又遠不如泉側生一派幾
墜箕裘姑詢二郡之負名高者爲狗尾續俟他日
驗焉

荔支譜

明 鄧道協

荔支一物種類實繁君謨摘辭簡古列品明備興公
採集羣書爭奇扼勝合此二譜誠難贅言不揣未學
輒爲蛇足者亦有說焉一以君謨墨本與印本之頗
異也二以各郡聲稱之不一也三以興公蒐採之未
盡也四以詩家錫名之未安也五以嶺南品第之當
定也六以古人比擬之實遠也七以畫手爲生之失
真也輒抒所聞聊爲博笑其佐議未敢鍼徐砭蔡若

集錄或可步王踵張云爾皆崇禎改元夏日

第一

忠惠以莆陽近產作郡福泉各距其家未盡百里督
課稍嚴民實向化風流儒雅迥異羣倫元夕則出教
張燈端陽則與民競渡成俗寓偕樂之意予嘗再役
泉州每渡萬安拜公遺像考公舊蹟思慕公之爲人
而公之書法已妙唐室宋朝諸公自當歛手渡口兩
碑韻高鋒正千仞不磨百世可師荔譜七章竟分虞
手歐褚而下難與鴈行惟寂與家主與生家與冢謬

誤滋甚使後世而下尊金石乎信梨棗乎余嘗數為
訂正參考異同疑信相半公之舊蹟獨見此二刻記
得友人林異卿見公手書劉氏墓碑从卧榛莽大為
賞識乃手目印搨傳之海內獨茲諸傳摹漸失其真
今安得初本而品題印證之庶幾不負忠惠作諸至
意

第二

荔支雖名土宜尤在培塿余嘗新正三日往鳳岡見
土人俱肩沃土堆積樹根地木以種植為事故荔子

獨甲諸處陳紫游紫本爲同生方紅周紅未甚區別
將軍卽爲天杜野種實是榔鍾七夕何異中元黃玉
原乎皺玉髓卵鵲卵一物異名火山海山仍是早熟
因其速化第見微酸若稍待時不嫌早慧余嘗食得
熟者未見作醋

第三

荔子原無用核種者皆用好枝刮去外皮以土包裹
待生白根如毛再用土覆一過以臘月鋸下至春遂
生新葉他木栽時皆去枝葉獨荔樹要畱宿葉承露

若葉去露稿則無生機余嘗六七月鋸荔支蘆新根
方生無不存活最怕日曬必求稍陰涼處時時灌水
方易生葉嘗在水西嶺東黃氏見池塘植山枝一顆
云係核種土人言山枝皆用核種無有鋸蘆者蘆字
之義果木非核種者稱蘆蓋福州方言也余嘗以龍
目作蘆今已生楠又以梅樹裹蘆次年花實凡樹枝
堅者皆可作蘆凡果核堅者方可爲種惟李無仁獨
否古人以王戎賣李鑽核千古負冤李一名夫人者
皮多帶粉故云今日核中無仁謬爲夫人李旣無仁

何用鑽核也徐譜以荔支種不佳者以好本接之龍
目有接法荔支恐無接法余前接數株皆不活

第四

蜀都賦云旁挺龍目側生荔支側生者對旁挺而言
何嘗以荔支卽名側生也果爾則龍目當稱旁挺矣
王敬美先生文章博識一代冠裳其爲陳玉叔作序
稱側生吐氣蔣中葆太史少年作賦名滿燕都且產
自溫陵亦稱側生聲價則側生之名乃文人錫予在
閩未嘗有此說也荔子本正出爲果中之王牡丹爲

花中之主若一立賤字榮辱所關柰何以側生名之
从懷扼腕未敢違爲聲說秣陵僑寓詳閩舊譜考究
蜀賦而斷側生卽旁挺之類殊非荔子之別名後之
作者毋蹈襲其繆誤

第五

五嶺七閩鄰封比境風土旣近氣韻攸同荔子高下
未能甲乙大抵此種爲美不特閩美而粵亦美此種
爲下不特粵下而閩亦下從來宦遊二土者皆未悉
其真味著本草圖經者謂此木以荔爲名而蒂牢甚

不可摘取乃以利斧剗砍其枝故名爲利枝此說不
經不特不知物性又且不知物情進向客粵食之甚
甘可比漳泉上品大抵五嶺過煖時多失候物亦宜
然福州寒暖適中物自純美嶺南縱不得與延壽勝
畫爭雄乃列蜀川之後實爲厚誣嘗從先子宦游滇
南見沐國翰丹荔數枚盛以金縷雕盤其酸不可入
口大抵摘之太早正味未全卽福州佳種亦以早摘
作酸急皆生質之過耶

第六

古人有以盧橘比荔子又有以荔子比楊梅又有以香櫟爭勝又有以櫻桃並妍又有尊之太過以龍眼爲之奴古今人皆未真識荔支趣也凡物各具一種之妙安得倫比惟時當盧橘則盧橘美時當楊梅則楊梅美各以其候爭妍取憐四時成功何能毀最而欲升之於上夷之於下其亦果中罪人

第七

劉崇龜姻舊或干以財則不吝惟圖荔支則受古文載此一段余不知崇龜何故獨重斯圖至此豈未之

見乎但荔支實難寫也余嘗見名手圖之無一生氣
此實天然正色不易名狀畫家原有難易桃花荔支
俱難描寫崇龜所好因以不易見珍耳每念中表陳
而孺寫生之妙未嘗屈過圖寫于今已矣言之黯然

記荔枝

溫陵吳載鰲

古今植菓其明艷可口無過荔枝者肉可食所謂鳥
得之高飛人嘗之肉肥也殼與其核皆可以香其於
五方惟閩粵巴蜀及交趾七郡有之漢初尉陀以備
方物唐天寶中楊妃篤嗜歲命清州驛致然荔之美
當在晨露初晞引手伸摘卽噉一人郵未見生荔枝
也廣南州郡與夔梓間早熟肌肉薄而味甘酸子宜
於澄四月杪輒遇荔枝然酸不可食大異吾閩閩中

惟四郡有之福州最多而興化之狀元紅核小如豆
最稱奇特泉漳時亦知名種近百品目多美若進貢
子綠羅袍早紅桂林皆擅甘滋之勝畧可相敵者在
廣僅黑葉耳若論龍眼則潮州之深田種厚而大閩
自長樂外不及也有宋蔡君謨曾命工寫生且恨其
隔於遠方不得班於盧橘江橙之右噫荔枝亦何忙
之有

其二

興化園池勝處惟種荔荔尤重者陳紫卽狀元紅其

樹晚熟其實廣上而圓下大可徑寸有五分香氣濃
遠色澤鮮紫殼薄而平瓢厚而瑩膜如桃花紅核如
丁香母剝之凝如水精食消如絳雪蔡君謨所謂天
下第一也凡荔枝皮膜形色有類乎是已爲中品然
士大夫怕熟者多不敢食予見前輩黃文簡先生嗜
好淡然自狀元紅出未嘗食第二顆而亦有枕藉流
連至以爲一月之飯者予食荔不能過五十顆蓋其
性熱甚食訖以啖他物輒不相宜云又有一種厚皮
尖刺肌理黃色附核而赤食之有渣此下等也評英

華明麗之文者亦宜作如是觀

其三

福州荔被野洪塘水西尤盛城中越山當州署之北
鬱爲林麓暑雨初霽晚日照紅數里熀如星火非名
畫之可描也初著花時商人計林斷之以立券其後
主者欲購亦必先與錢泉漳亦然其紅鹽者水浮陸
轉以入京師外省之屬莫不愛好故商人販彌
多而種植彌繁然荔之性豈嗜鹽者哉持鹽入甘大
可莞爾此無奈何之計云爾品目至多惟江家綠爲

州第一莫敢低邛余每應鄉試輒以六月後行未
敢一福荔也快心於其藕節與龍眼而已矣

其四

夢坡周生四千里由杭而之澄以余之失耦也來相
視至乎渡口見荔而駭不知其何物也但見顏色鮮
紅出三十文遣僕買焉賣荔者命之間襟以承旣滿
懷仍有多許夢坡曰嘻是大佳物抑又何價之廉也
每日噉之者再至於不計酸滯且謀之余曰家母氏
平生未嘗得食此至甘願移一本而植之家園焉余

蓋聞之而有深感也子母分身而同息故嚙指之精
誠感萬里卧冰之應下躍鱗魚吾聞荔木堅理難老
恒可百年荔之實則以蠲渴補髓見美於穉川若使
堂北永有萱中國忽生荔垂白老人進一顆而開顏
其與綏山桃安期棗夫何以異

其五

初種畏寒方五七年深冬覆之以護霜霰花春生藪
藪然白色其實多少在風雨時與不時也間歲生者
謂之歇枝有仍歲生者半生半歇春花之際旁生新

葉其色紅白六七月時色已變綠此明年開花者也
今年實者明年歛枝也忌麝香遇之花實盡落其熟
未更採而鳥皆不敢近或已取之蝙蝠蜂蟻爭未蠹
食園家有名樹旁植四柱小樓夜守之防盜又破竹
五尺七尺擣之咿咿然以逐蝙蝠之屬吾嘗與李傅
二友過名園噉荔噉二百未竟量而李爲炎氣所薰
遂坐假寐傅曰是其簪可再買也拔而售之更得三
百荔斯須李醒顧盤曰荔尚有耶悅甚乃再噉噉竟
自循其髮曰女曾戲我遂大笑而竟噉量焉

其六

荔而紅鹽也如幹愈投荒蘇軾寓黃也雖有些風致
已落惡境荔而白晒也如曲端承酒周興入甕也枯
槁烈日中其味盡索荔而蜜煎也以甘受甘異甘而
強之使受譬如陶貞白質本清華儘快松風之夢又
故使爲宰相小此一番宰相不更受用太過耶人性
各有宜適福澤甘馨附益反損其趣者蜜煎是也古
以此修貢道里旣遙人畜俱損晒煎之間又或因而
賁賂豈如 清朝不貴無益之物不貽前丁後蔡之

嘲而九譯通道遐方貢璞之爲長筭也哉

其七

陳紫江綠方家紅

游家紫出名十年種自陳紫而實大過之可謂黃於

地青於藍者也 小陳紫 宋公荔枝 周家紅個

立興化軍何家紅出於漳法石白在泉法石院綠核

色丹而小荔皆紫核此以綠異出福州

圓丁香體味皆勝有標核

已上十二品依蔡君謨等次自虎皮下則無等次凡

二十品

虎皮以色名牛心以狀名玳瑁紅硃黃朱柿均以點
色得名 蒲桃荔枝 蚶殼 龍牙頗怪 水荔枝
漿多而淡 蜜荔枝純甘如蜜是日過甘失味之中
丁香荔枝核如小丁香 大丁香味澁 雙髻小
荔枝真珠肉圓白如珠荔之小者止於此
十八娘荔枝色深紅而細時方之少女俚傳閩王王
氏有女第十八好噉此品因而得名噉使娘子而似
荔枝則謂荔枝之化可也使荔枝而托十八娘以傳
則真可無負荔枝也

將軍荔枝五代間有爲此官者種之後人以其官號其樹亦如大夫松然然而松爲秦所封斯玷松矣如荔枝者善點綴將軍乃武乃文也

銀頭顆紅而小故特貴

粉紅者則謂其如傅朱粉之飾故名

中元紅荔枝將絕方熟以晚重於時吾泉中荔枝過時輒有山荔山荔者荔之閨位也

火山本出廣東四月熟味甘酸肉薄淨泉俱有之

几種植多以子以核獨荔則用奪接之法法於春夏

時取荔南枝之嫩者刈其皮徑二寸以上破砵兩封而繩之將及暮其處徧生根度可奪種乃加斧焉其枝遂活隔二年亦生子雖不多然亦甘美可食直未能大耳其於人也居常宅許則周公之孫子蒼梧翠竹爲北平之家兒氣類蒸感自可奪舍投胎夫具體而微卽荔亦有之也

廣菌譜

新安潘之恒

木菌

木菌卽木耳生於朽木之上無枝葉乃濕熱餘氣所
生亦名木樛木墖樹雞木蛾曰耳曰蛾象形也曰樛
以軟濕爲佳也曰墖曰雞因味似也南楚人謂雞爲
墖口菌亦象形於鰓乃貝子之名或云地生爲菌木
生爲蛾北人曰蛾南人曰草

五木耳

五木耳生犍爲山谷中六月多雨時采之暴乾可烹食陶弘景云此五木耳不顯言是何木惟桑樹生桑耳有青黃赤白者軟濕者人采以作菹無復藥用蘇恭云桑槐楮榆柳此爲五木耳軟者並堪啖楮耳人常食槐耳療痔

桑耳

桑耳曰孺曰蛾曰雞曰黃曰臣皆冠以桑又呼爲桑上寄生

槐耳

槐耳亦名槐菌名亦雞而稱橋蛾如桑椹惟齋漿帶安其上以艸覆之卽生單耳

槲耳

槲耳主補胃理氣治反胃吐痰用五七箇煎湯服卽愈

杉菌

杉菌出宜州生積年杉木上狀若菌采無時

皂角菌

皂角菌生皂樹上木耳也不可食

香葦

香葦生桐柳枳椇木上紫色者名香葦字从草从覃
覃延也葦味雋永有覃延之意

天花葦

天花葦卽天花菜出五臺山形如松花而大於十香
氣如葦白色食之甚美

麻菰葦

麻菰葦出東淮北山間埋桑楮木於土中澆以米泔
待菰生采之長二三寸本小末大白色柔軟其中空

虛狀如未開玉簪花俗名鷄足藤蕈謂其味狀相似也一種狀如羊肚有蜂窠服者名羊肚菜

鷄縱蕈

鷄縱蕈出雲南生沙地間丁蕈也高脚繖頭土人采烘寄遠以充方物氣味似香蕈而不及其風韻

雷蕈

雷蕈出廣西橫州過雷過卽生須疾采之稍遲則腐或老不堪用矣作羹甚美亦如雞縱之屬其價並珍

舵菜

舵菜卽海船舶上所生菌也亦不多得

鍾馗菌

鍾馗菌卽土菌地上經秋雨生重臺者一名仙人帽
蓋鍾馗神名也此菌釘上若繖其狀如鍾馗之帽故
以名之亦名地鷄亦名獐頭菌

鬼菌

鬼蓋鬼繖鬼屋皆菌種而異名夏日得雨聚生垣墻
下多赤色或生糞堆上見日卽消黑旦生而夕死亦
各地蓋地苓又名鬼筆者生穢處頭如筆紫色名朝

生暮落花小兒呼爲狗溺卽鬼蓋之類而無纖者是
此類皆主瘡疥晒乾研末和油塗之牛糞上黑菌尤
佳又馬勃亦菌類也

竹蓐

竹蓐卽竹菰也草更生日蓐得溽濕之氣而成本艸
作竹肉因其味也生慈竹林夏月逢雨滴汁着地涌
出如鹿角白色者可食生苦竹枝上如鷄子似肉鬱
者有大毒又曰竹菰生朽竹根節上狀如木耳或紅
白色酉陽雜俎云江淮有竹肉大如彈丸味如白樹

雖卽此物也惟苦竹生者有毒

藿菌

藿菌之藿當作茈乃蘆葦之屬讀如桓若音觀乃鳥
名或以爲鶴屎所化非也今渤海蘆葦澤中鹹鹵地
往往有之其菌色白輕虛表裏相似與衆菌不同療
蚊蟲有效出滄州秋雨以時乃有之若天旱久霖卽
稀日乾者良

地耳

地耳卽地踏菰生丘陵如碧石青也亦石耳之屬生

於地中者爾

石耳

石耳亦名靈芝生天台四明河南宣州黃山巴西邊
徼諸石崖取高處遠望如烟山中人縋絙采之必險
絕處乃得今廬山亦多狀如地耳寺僧采曝餽遠先
去沙土作茹勝如木耳佳品也

葛乳

葛乳諸名山皆有之惟太和山采取乃葛之精華秋
霜浮空如芝菌涌生地上其色赤質脆

種芋法

吳郡黃省魯

一之名

芋說文曰大葉實根駭人故謂之芋徐鍇曰芋猶
𦵏驚辭也故曰駭人齊人謂之𦵏孝經援神契謂之
𦵏芋廣雅謂之渠芋葉謂之𦵏載廣志凡十四等有
曰君子芋大如斗魁如杵旅有曰車轂芋有曰銀子
芋有曰旁巨芋有曰青邊芋此四芋是多子有曰𦵏
芋魁大如瓶小子葉如繖蓋糾色而紫莖其長丈餘

種芋法

八

一

易熟長是爲芋之最善者莖可作羹臠肥澀得飲乃
下有曰蔓芋緣枝而生有曰鷄子芋色黃有曰百果
芋魁大而子繁多畝收百斛種以百畝葉以養薹有
曰旱芋七月熟有曰九面芋大而不美有曰象空芋
大而弱使人易飢有曰青芋有素芋子皆不可食

唐本注云芋有六種青芋細長毒多初煮要湏灰汁
易水熟乃堪食爾白芋圓芋連禪芋紫芋毒少並正
爾蒸煮噉之員白連禪又可兼肉作羹野芋大毒不
可噉也陶隱居謂之老芋形葉相似如一根並殺人

垂死者飲以土漿糞汁可活本草謂之土芝蜀謂之
蹲鴟前漢謂之芋魁後漢謂之芋渠葉俞縣有百子
芋新鄭有博士芋蔓生而根如鵝鴨卵今有南京芋
煮之可拈皮而食甘滑異於它品茅山有紫芋吳郡
所產大者謂之芋頭旁生小者謂之芋妳種之水田
者爲水芋但廣雅曰藉姑水芋也亦曰烏芋本草烏
芋一名水萍一名槎牙一名茨菰一名鳧茨毘陵錄
謂之燕尾草以其葉如桎也又名田酥狀如澤瀉不
正似芋根黃而小恐自爲一種非土芝之水芋也

種芋法

八

二

安錄有乾濕二種濕名水芋乾名黃芋味差劣松志
蘇之西境多水芋以芋魁爲旱芋嘉定名之博羅又
有皮黃肉白甘美可食莖葉如扁豆而細謂之香芋
又有引蔓開花花落卽生名之曰落花生皆嘉定有
之

二之食忌

本草云有毒陶隱居曰生則有毒性滑尤爲服餌家
之所忌博物志云野芋狀小于家芋食之殺人蓋葢
也家芋種之三年不收旅生亦不可食劉禹錫云十

月後曬乾收之冬月食不發病它時月不可食久食則虛勞無力圖經曰食之過多則有損傷唐本云多食動宿冷

三之藝

種芋之古法汜勝之書曰區方深皆三尺取豆箕納區中足踐之厚尺五寸取區上濕土和糞納區中箕上厚尺二寸以水澆之足踐令保澤取五芋子置四角及中央足踐之旱則數澆箕爛芋生子皆長三尺一區收三石

種芋法

八

三

齊民要術云宜擇肥緩土近水處和桑糞之二月注
雨可種率二尺下一本芋生根欲深刷其旁以緩其
土旱則注之有草鋤之不厭數多治芋如此其收常
倍

崔寔曰正月可蒔芋

家政法曰二月可種芋

務本新書曰芋宜沙白地地宜深耕二月種爲上時
相去六七寸下一芋芋羞三目衆人來往眼日多見
并聞刷鍋聲處多不滋胤比及炎熱苗高則旺頻鋤

其旁秋生子葉以上壅其根霜後收之又云區長丈餘深濶各一尺區行相間一步寬則透風滋胤

物類相感志江湖所生土芋磊塊自實若天雷頻則多生若耕種欲取不得名之若呼芋字則逡巡不見矣

種芋之今法十月收芋子不必芋魁恐妨鬻食但擇旁生圓全者每畝約畱三千子掘地尺五寸窖藏之上覆以土若不藏經凍則踈壞無力矣至開春地氣通可耕先鋤地摩塊曬得白背又倒土以曬二三次

去其草每畝用厩糞二十擔勻澆俟糞入土卽再鋤
轉否則糞見日而力薄臨種下水之後再下豆餅五
斗清明後下秧秧田種田皆宜加以新土和桑之否
則蔣插硬礫損子秧田鋤過曬得白背車水作平出
所窖芋子有芽者以芽其上無芽者以根在下密布
田中以稻草蓋之口曝其芽萎瘁日澆水一次或隔
日亦可待芽間吐發三四葉長二三寸卽可種矣葉
多而太長則種之必盡落故葉而重吐發是爲失時
種時相去一尺八寸下一芋子或一尺六寸種必在

小滿前種後肥土必深沸宜去其草乾一二日其根
乃行不乾則根腐黃而不生乾至小小土圻卽上水
若大圻則乾壞矣常常使潤澤種時以陰天乃爲佳
至七月乃塘塘法在芋子四角之中掘其土遍畝皆
然壅在根上則土緩而結子圓大霜後起之芋魁每
千可鬻白金一兩芋妳千斤可鬻白金一兩五錢田
之有瓦礫者不可種凡種二歲必再易田不然則不
長旺所易之田種禾仍佳

凡種旱芋於二三月間往杭州買白者方是湏求糞

土淺耕下秧俟秧出復耕地懸開三四寸種後以土厚壅其根日溉之以水糞苗長不必糞則旁生小者尤多於水芋

其種就畱於地冬間覆以稻草至明年二三月間起曬乾再下秧復如前種

四之事

史記卓王孫曰岷山之下沃野下有蹲鴟至死不飢蹲鴟者大芋也

左思三都賦所謂蹲鴟之沃則以爲濟世陽九是也

袁安爲陰平長時年飢租入不畢安聽使輸芋曰百姓飢因長何得食穀先自引芋而食

薛包歸先人塚側種稻芋稻以祭先芋以自給

李雄克成都衆甚飢餒乃將民就穀于郪掘野芋而食之

列仙傳曰酒客爲梁使蒸民益種芋三年當大飢卒如其言梁民不死

齊民要術曰芋可以度飢饉度凶年今中國多不以此爲意後生有耳目所不見聞者及水旱風蟲霜雹

之災便能餓死滿道白骨交橫知而不種坐致泥滅
悲夫人君者安可不督課之哉

甬東屠木峻

按周逸之云草生大塊中不煩灌溉而滋蔓長活
萋萋芊芊於淡泊之鄉栖遑而不能爲辱把玩而
不能爲榮吾甚賞其言也夫菜之爲物也名理談
玄非此無以澄其清素畸人旅寓非此無以慰其
饑殮病骨癯骸非此無以養其冲和擊鮮嚼肥非
此無以解其腥羶由是清虛藉以日來滓穢因之
日去信乎紈袴膏粱遇而不顧鐘鳴鼎食擯而不

野菜箋

八

一

錄也予四明人也四明野菜同于王周兩君者不收收其異者二十二品詠之非四明所產者曰蕺荷種蒔不煩灌溉者曰甘菊日露茺萎灌溉種蒔而成者曰雪裏蕻香芋落花生芋禾蹲鴟

荏

物生無種惟茵與芝採之掇之可以療饑南山有蕨西山有薇與爾栖遲飽餐是宜

萱

鑿沼如帶開畦若簣種鮒薦先莼蔬謀醉凡今之時

一切征稅憂來無方誰爲生計焉得萱草言樹之背
芹
有芳者芹香滑擬萼薄言採之于河之漘甘而美之
相彼野人相彼野人欲獻至尊

草決明

惟茲決明有石有草石也體剛草也色好葱蒨秋妍
幽人所憐雨中百草爛死階下決明色鮮

椿芽

香椿香椿生無花葉嬌枝嫩成杈枒不比海上大椿

八千歲歲人不採其芽香椿香椿慎勿譁兒童攀
摘來點茶嚼之竟日香齒牙

薇

可茹可茹彼美有薇何以至此在水之湄伊誰採之
古也伯夷

蕨

採掇採掇彼美有蕨既茹其其不畏其麀勿謂其踐
歟歲可活

百合

有藕似蓮有根如蒜淨友不御酒人所壓予昔聞中
魯宴喜談向餽烝一染指十載不敢親皓齒恐輩臙
脂顏色死

金雀芽

漢武車中黃金雀飛去多時覓不著歲久幻出仙草
精來向波臣國裏生波臣國名金雀樹以此供茶有
清趣嘗見吾家老家督一勺三日輕勑宰

甘菊芽

惟南有谷金水甘惟土有菊其草仙惟君子今不素

餐老人前日苦頭痛爲枕爲茶亦不定夜誦陳琳檄
一篇朝起魏武霍然病

玉環菜

甘露草生何欄珊堪綴步搖照玉環所以因名玉環
菜一嚼蕭爽齒牙間有菜勿菽宋宇圖有果勿蒸哀
仲梨宋宇鼎俎亦多品借問備員玉環宜不宜

薯蕷

誰將薯蕷沙畦梳煮得清泉映白石但可吟邊細細
嘗豈應醉後頻頻食如姬極知薯蕷清洗手排當薯

蘋羹終非七子同羣飲堪伴三閭共獨醒

落花生

落花一落蓓蘂成落花不落蘂不生世人盡惜花欲
落我願落花長落蘂長馨朝來點茶花片輕香迸磁
甌清更清盧仝七碗喫不得無端笑殺落花生

香芋

東田芋子白如石西田芋子黃如栗百日滑流匙栗
黃甜似蜜我今採石兼採栗渴可生津饑得力豪華
公子不解餐翻嫌此芋點茶多氣息

蘘荷

尼父處鄉食不徹姜楚騷有荷著名曰蘘白者白蘘
赤者赤蘘通稱神明啖爾辛芳

雪裏蒨

四明有菜名雪裏蒨頭旨蓄珍莫比雪深諸菜凍欲
死此菜青青蒨尤美吾欲肉食兮無卿相之腹血食
今無聖賢之德不如且啖雪裏蒨還共酒民對案時
求益

芋禾

山芋青青田芋輒田家藉作凶年飯芋禾采采翻其
翻飽食山中行得遠昨者山人遺一盂平平之腹安
居諸食之其欲獻天子共笑老夫愁且慙

蹲鴟

歎歲粒米無一收下有蹲鴟餒不憂大者如盎小如
毬地爐文火煨悠悠須臾清香戶外幽剖之忽然眉
破愁玉脂如昉粉且柔芋魁芋魁滿載甌朝啖一顆
鼓腹游飽餐遠勝翺羊頭何不封汝關內侯

香棟腦

緣溪棟樹翠且環遙望深深如遠山花如木樨亦瑣
碎香若茉莉非等閒溪邊歲久樹不少嫩葉叢叢青
未了小君摘此來點茶浮動清泉香棟腦

梔子花

給孤園中祇樹羅金粟薝蔔兼娑羅是時金仙開講
席目觀還同鼻觀多一從阿難提獎後摩登不復興
妖麼饑餐渴飲不可那手持應器諸門過絕似薝蔔
麵與拖三咽馨香五臟和

楨桐芽

小雨霏霏紅藥翻階光無地而不艷顏無日而不開
擊如意七尺高之珊瑚盡碎藏金谷四十里之錦帳
空圍皎童方度曲明月又啣盃勞目成傳手中芍藥
步丁東返上官娥眉挹清光兮荏苒味餘酌兮徘徊

莞菱

相彼莞菱化胡携來臭如葷草脆比松薑肉食者喜
藿食者諧惟吾佛子致謹於齋或言西域與渠別有
種使我罷食而疑猜

野菜譜

明餘姚滑浩

士君子一生出處不在廊廟則在山林故得意而
鳴其盛則寄詠於膏雨之黍苗或矢音于朝陽之
梧實意之所至吟頌隨之卽或泉石自娛而茶經
食譜以至溪毛澗芷之微無不可以供塵餘而資
談噱此亦山林韻事不得志於時者之所爲也余
向以忤璫謫居舊圃徜徉于葢山蘭渚之間尊羹
藿食性若安之矣暇前笥中書見所謂野菜譜一

帙皆出尋常藝植之外因各係以詩嘯詠之餘每
饒野意雖不敢比於先賢菜窩諸說然而託物寓
言聊以備圖叟農書之外史云爾昔賢之誦不也
有曰民間不可一日有此色士君子不可一日不
知此味夫使民間菜色不形而吾儕各無忌咬菜
根之初念在廟廊則憂其民在山林亦不敢不憂
其君出處之間各成其適其敢曰肉食者鄙而朝
詡矜菴食以自傲也哉

白鼓釘

一名蒲公英四時皆有惟極
寒天小而可用採之熟食

白鼓釘白鼓釘豐年賽社鼓不停凶年罷社鼓絕聲
鼓絕聲社公惱白鼓釘化為艸

剪刀股

春採生食
兼可作醬

剪刀股剪何益剪得今年地皮赤東家羅綺西家綾
今年不聞剪刀聲

猪殃殃

猪食之則病故
名春採熟食

猪殃殃胡不祥猪不食藥道傍採之採之充吾腸

絲蕎蕎

二三月採熟食
四月結角不用

絲蕎蕎如絲縷昔爲養蠶人今作挑菜侶養蠶衣整

齊挑菜衣襤褸張家姑李家女隴頭相見淚如雨

牛塘利

二三月採熟食亦可作羹

牛塘利牛得濟種草有餘青蓄水有餘味年來水草
枯忽變爲荒薺采采療人饑更得牛塘利

浮薺

入夏生水中六七
月採生熟皆可食

采采浮薺涉彼滄浪無根可托有莖可嘗野風浩浩
野水茫茫飄蕩不返若我流亡

水菜

秋生水田狀
類白菜熟食

水菜生水中水深不可得挈筥遠堤行日暮風波息

水清忽炤人面色如菜色

看麥娘

隨麥生醃上因
名春採可熟食

看麥娘來何早麥未登人未飽吾當與爾還厥家共

燕糟糠暫相保

狗腳跡

生霜降時葉如
狗印故名熟食

狗腳跡何處尋狡兔亂走妖狐吟北風揚沙一尺深
狗腳跡何處尋

破破衲

膾月便生正二月采
熟食三月老不堪食

破破衲不堪補寒且饑聊作脯飽暖時不忘汝

野菜譜

滑

斜蒿

三四月生小者一科俱可用大者摘嫩頭于湯中畧過晒乾臨時再用湯泡油盐拌

食白食

亦可

斜蒿復斜蒿采采臨春郊終日不盈把悵望登東臯
欲進不能進風日寒瀟瀟

江薺

生陂月生熟食可用花時不可食但可作羹用

江薺青青江水綠江邊挑菜女兒哭爺孃新歿兄趁

熟止存我與妹看屋

燕子不來香

早春采可熟食燕來時則腥不堪食故名

燕子不來香燕子來時便不香我願今年燕不來常

與吾民克饑糧

胡孫脚跡

以形似名三月采之熟食

胡孫脚跡空爾采石胡不自安犯我田宅遭彼侵凌
猷畝蕭瑟獲而烹之償我稼穡

眼子菜

六七月采生水澤中青葉背紫色莖柔滑而細長可數尺熟食

眼子菜如張目年年盼青懷布穀猶向秋來望時熟
何事頻年倦不開愁看四野波漂屋

貓耳朵

正三月采搗爛和粉麪作餅蒸常之

貓耳朵聽我歌今年水患傷田禾倉廩空虛鼠棄糗

猶兮猶兮將奈何

地踏菜

一名地耳狀如木耳春夏生雨中雨後采熟食見日則枯沒化為水

地踏菜生雨中晴日一炤郊原空莊前阿婆呼阿翁
相携兒女去匆匆須臾采得青蒲籠還家飽食忘歲
凶東家嬾婦睡正濃

窩螺薺

正月二月采之熟食

窩螺薺如螺髻生水邊炤華麗去年郎家田不收挑
菜女兒不上頭出門忽見窩螺羞

烏藍擔

烏大也村人鳴大爲烏烏此菜但可熟食之

烏藍擔擔不動去時腹中饑歸來肩上重行路遲日
暮還家方早炊

蒲兒根

卽蒲草嫩根也
生熟皆可食

蒲兒根生水曲年年砍蒲千萬束水鄉人家衣食足
今年水深渰絕蒲食盡蒲根生意無

馬欄頭

二三月叢生熟
食又可作羹

馬欄頭攔路生我爲拔之容馬行只恐救荒人出城
騎馬直到破柴荆

青蒿兒

卽茵陳蒿春月采之炊食時倍
二月二日和粉麴作餅者是也

青蒿兒纔發類二月二日春猶冷家家兢作茵陳餅
茵陳療病還療饑借問采蒿知不知

簪籬頭

臘月采熟食
入春不宜用

簪籬頭延蔓草傷籬生青梟梟今年新貴穀不收折
簪籬煮簪籬頭

馬齒莧

入夏采沸湯瀹過曝乾冬用
旋食亦可楚人俗元旦食之

馬齒莧馬齒莧風俗相傳食元旦何事年來采更頻
終朝賴爾供飧飯

馬腸子

二月生如豆芽菜
熟食之生亦可食

鴈腸子遺溝壑應是今年絕飲啄兩翼低垂去不前
苦遭餓鵲相擒搏嗟哉鴈今有羽翰何況人生行路
難

野落籬

正二月采頭
湯過可食之

野落籬舊遮護昔爲里正家今作逃亡戶春來荒蕪
滿堦生挑菜人穿屋裡行

菱兒菜

入夏生水澤中卽
菱牙也生熟皆用

菱兒菜生水底若蘆芽勝菰米我欲充饑采不能滿
眼風波淚如洗

倒灌薺

米之熟食
亦可作蘆

倒灌薺生早田上無雨露下有泉抱甕不來還自鮮

造物冥冥解倒懸

灰條

此菜二種一種葉大而赤卽藜藿一種
葉小而青卽今所采者湯通油鹽伴食

灰條復灰條采采何辭勞野人當年飽藜藿凶歲得
此爲佳穀東家鼎食滋味饒徹却少牢羹太牢

烏英

一名烏英花入夏生水澤
中生熟皆食六月不可用

烏英花烏英菜菜可茹今花可愛連朝摘菜不聊生
豈有心情摘花戴

抱娘蒿

叢生故名二三
月采可熟食

抱娘蒿結根牢解不散如漆膠君不見昨朝兒賣客
船上兒抱娘哭不肯放

枸杞頭

村人采爲甜菜頭春夏采嫩頭熟食
秋采實卽枸杞子冬采根卽地骨皮

枸杞頭生高丘實爲藥餌來甘州二載淮南穀不收
禾春米夏還米秋饑人飽食如珍羞

苦蔴臺

二月采用葉搗和
麴作餅生亦可食

苦蔴臺帶苦嘗雖逆口勝空腸但願收糴了官府不
辭吃盡田家苦

野菜譜

川

七

羊耳禿

二三月
采熟食

羊耳禿短簇簇穿籬籬如羝觸饑來進退無如何前

村後村荆棘多

野苣菜

類家苣更
采熟食之

野苣菜生何少盡日采之克一飽城中赤苣美且肥
一錢一束賤如艸

黃花兒

正二月
采熟食

黃花兒郊外草不愛爾花愛爾克我飽洛陽姚家深

院深一年一賞費千金

水馬齒

生水中與旱馬齒相類熟食

水馬齒何時落食玉粒啣金嚼我民餓殍盈溝壑惟
皇震怒剔厥齒化爲野草克離糞

野苧薺

四時采生
熟皆可食

野苧薺生稻畦苦薺不盡心力疲造物有意防民饑
年來水患絕五穀爾獨結實何累累

蒿柴薺

蒿柴薺我獨憐葉可食楮可燃連朝風雨欄村路饑
寒不能出門去

野綠豆

莖葉如綠豆而小生野田多藤蔓生熟皆可食

野綠豆匪耕耨不種而生不箕而秀摘之無窮食之無臭百穀不登爾何獨茂

油灼灼

生水邊葉光澤生熟皆食又可作乾菜食

油灼灼光錯落生岸邊炤溝壑溝壑朝來餓殍填骨肉未冷攢烏鳶

雷聲菌

夏秋雷雨後生茂草中如蘑菇味亦相似

雷聲菌如卷耳恐是蟄龍兒雷聲呼轍起休誇瑞草生莫嗟靈芝歟如此凶年穀不登縱有禎祥安足倚

萁蒿

春采苗葉熟食夏秋
莖可作藥心可入茶

采萁蒿采枝采葉還采苗我獨采根賣城廓城裡人

家半零落

掃箒齊

春采
熟食

掃箒齊青簇簇去年不收空倚屋但願今年收兩熟

場頭掃箒盡禿

雀兒綿單

三月采可作簾此菜甚
蔓延鋪地而生故名之

雀兒綿單託彼終宿如茵如余匪絲匪穀年饑願得

克我餐但穿我屋蔽爾寒

野菜譜

滑

九

菱科

夏秋采
熟食

采菱科采菱科小舟日日隨清波菱科采得餘幾何

竟無人唱採菱歌風流無復越溪女但採菱科救饑

餒

燈蛾兒

二月采
熟食

燈蛾兒落滿地化作草青青遭此饑荒歲曾見當年

遠絳紗子今燈火幾人家

薺菜兒

春日采之生
熟食可食

薺菜兒年年有采之一二遺八九今年纔出土腹中

挑菜人來不停手而今狼藉已不堪安得花開三月

三

芽兒拳

正二月
禾熟食

芽兒拳生樹邊白如雪軟如綿煮來不食淚如雨昨

朝兒賣他州府

板蕎蕎

正二月和羹采之炊食
三四月結角不堪用

板蕎蕎兮吾不識出無路兮入無室將學道兮歸空

山草爲衣兮木爲食

碎米薺

三月采止
可作羹

野菜譜

滑

十

碎米薺如布穀想爲民饑天雨粟官倉一月一開放
造物生生無盡藏

天藕兒

根如藕而小熟食酢菜不可食

天藕兒降平陸活生民如雨粟昨日湖邊聞野哭忽
憶當年採蓮曲

老鸛舠

二月米之熟食亦可作羹

老鸛舠老鸛舠去年水涸無纖鱗蟻垤纍纍聲不聞
老鸛何在舠獨存

鷺覲草

正二月如麥青炊食

鶩觀艸滿地青青鶩食飽年來赤地不堪觀又被饑人分食了鶩觀草

牛尾瘟

生深小中葉如髮莖如藻冬月和魚煮食夏秋亦可食之

牛尾瘟不可吞疫氣重流遠村黃毛牯烏毛牯十莊九疇無一存摩杪犁耙淚如湧田中無牛更無種

野蘿蔔

葉似蘆菔故名熟食

野蘿蔔生平陸匪蔓菁菁若蘆菔求之不難烹易熟饑來獲之勝梁肉

兔絲根

一名兔絲苗春采苗葉秋冬采根蒸食味甘多食令人眩暈也

兔絲根美可嘗千萬結如我腸饑人得食不輟口腸
細食多灰八九

艸鞋片

二三月
米熟食

艸鞋片甘貧賤不踏軟紅塵常行芳草茵從教惡且
穀忍向泥塗棄一任前途阻且長着來猶能趁熟腸

抓抓兒

秋深采之曰乾和穀
著食如粉清香可愛

抓抓兒生水滑却似瓦松初出時須知可食不可棄
不能療癢能療饑

雀舌艸

其形似稱初
生時采熟食

雀舌艸葉似茶采之采之溪之涯途中餒渴不能進
遍尋烟火無人家